

# SOLENI DADE PENTEKOSTES

## Tema

Tema domingu ne'e nian mak Espíritu Santu. Maromak nia don ba fiar-na'in hotu, Espíritu ne'ebé fó vida, hafoun, nakfilak, harii comunidade no halo moris Ema Foun.

*Evanjellu* apresenta mai ita comunidade kristán, halibur hale'u Jezús moris-hi'as. Ba João, comunidade ida ne'e sai comunidade moris nian, kria foun fali, husi don Espíritu nian. Espíritu mak permite fiar-na'in sira atu manán laran-ta'uk no limitasaun sira no fó sasin iha mundu kona-ba domin ne'e, ne'ebé Jezús rasik moris to'o iha konsekuénsia ikus.

Iha *leitura dahuluk*, Lucas sujere katak Espíritu mak lei foun ne'ebé orienta fiar-na'in nia dalan. Nia mak kria comunidade foun Maromak nia Povu nian, halo ema iha kbiit atu ultrapasa diferença sira no komunika, nia mak halo comunidade ida de'it iha domin, maski mai husi povu hotu, rasa no kultura sira.

Iha *leitura daruak*, Paulo aviza katak Espíritu mak bee-matan husi ne'ebé suli comunidade kristán nia moris. Nia mak haraik don sira ne'ebé hariku comunidade no haburas unidade membru hotu nian; tanba ne'e, don sira ne'e la bele uza ba benefísiu pesoál, maibé tenke uza ba ema hotu nia servisu.

## LEITURA I – Apóst 2,1-11

Testu ne'ebé ohin propoin mai ita (hanesan ita hatene ona la'ós reportajem akontesimentu ida nian) deskreve lora Pentekostes nian. Lahó dúvida ida-ne'e rekonstrusaun artifisiál ida ne'ebé Lucas kria ho intensaun teolójika ida. Atu apresenta ninia katekeze, Lucas uza imajen sira, símbolu sira, linguajen poética metáfora nian. Ba ita knaar atu dekodifika símbolu sira atu ita to'o ba interpelasaun esensiál ne'ebé katekeze primitiva, liuhusi Lucas, husik mai ita. Interpretasaun literál relatu ne'e nian, halo ita husik mensajen ninia esensiál; halo ita haree mak hatais esteriór, folkore, no ignora buat ne'ebé fundamentál. Interese fundamentál autór nian mak apresenta Igreja nu'udar comunidade ne'ebé moris husi Jezús, no hetan Espíritu nia asisténsia no simu bolun atu fó sasin ba ema sira, Aman Maromak nia projetu libertadór.

## MENSAJEN

Uluknanai, Lucas hatuur esperiénsia Espíritu nian iha lora Pentekostes. Pentekostes mak festa judaika ida, celebra liutiha lora limanulu festa Páskua. Festa nia orijen mak festa agríkola ida, iha ne'ebé ema agradese Maromak ba produktu sira sereál nian hanesan trigu no seluk tan; iha sékulo I, nia sai festa istórika ne'ebé celebra aliansa. Don Lei nian iha Sinai no konstituisaun ka hariin Povu Maromak nian. Hodi tau iha lora ne'e don Espíritu nian, Lucas sujere katak Espíritu mak lei aliansa foun nian (basá nia mak, iha tempu Igreja nian, dinamiza fiar-na'in sira nia moris) no katak, husi Nia, harii comunidade foun Maromak nia Povu nian – comunidade mesiánika, ne'ebé moris husi lei ne'ebé Espíritu hakerek iha dixípulu ida nia fuan laran (kf. Ez 36,26-28).

Hafoin mai narrativa manifestasaun Espíritu nian (Apóst ,2-4). Iha Espíritu mak “Maromak nia kbiit”, ne'ebé apresenta iha ne'e liuhusi símbolu rua: anin boot no ahi lakan. Sira-ne'e mak símbolu revelasaun Maromak nian iha Sinai, bainhira Maromak haraik ba Povu Lei no

foti Israel nu'udar Maromak nia Povu (kf. Ex 19,16.18; Dt 4,36). Símbolu sira-ne'e evoka Maromak nia kbiit maka'as. Mai hasoru ema, komunika ho ema no, hodi fó Espíritu ba ema, harii Maromak nia komunidadade.

Espíritu (Maromak nia kbiit) hetan aprezentasaun ho forma lian ahi nian. Lian la'ós de'it espresaun identidade kuturál grupu umanu ida-nian, maibé mós maneira atu komunika, atu estabelese ligasaun ne'ebé dura entre ema sira, kria komunidadade. "Ko'alia lian seluk" katak kira relasaun sira, possibilidade atu supera "sukuizmu", egoizmu, divizaun, rasizmu, marjinalizasaun... Iha ne'e, ita iha kontráriu Babel nian (kf. Gn 11,1-9): iha ne'ebá, ema hili foti-an, ambisaun laho sasukat ne'ebé lori ba separasaun, dezentendimentu; iha ne'e ema fila fali ba unidade, ba relasaun, ba konstrusaun komunidadade ida nian ho kapasidade ba diálogo, entendimentu, komunikasaun. Mosu mai umanidade ida iha uniaun, la'ós liuhusi forsa, maibé husi partilla esperiênsia interiór hanesan, bee-matan liberdade nian, komuñaun nian, domin nian. Komunidadade mesiánika mak komunidadade iha-ne'ebé Maromak nia asaun (liuhusi Espíritu) modifika profundamente relasaun umana sira, hodi lori ba partilla, ba relasaun, ba domin.

Iha enkuadramentu ida-ne'e mak ita tenke komprende efeitu sira manifestasaun Espíritu nian (kf. Apóst 2,5-13): ema hotu ne'ebé rona sira haklaken ho sira nia lian rasik Maromak nia kmanek boot hotu. Lista povu sira ne'ebé Espíritu bolu no halibur hamutuk reprezenta mundu antigu tomak, husi Mezopotámia, liu ba Kanaan, ba Ázia Menór, ba norte Áfrika nian, to'o Roma: ba sira hotu tenke to'o Jezús nia proposta libertadora, ne'ebé halo povu hotu ida de'it iha komunidadade domin no partilla nian. Komunidadade Jezús nian hetan kbiit husi Espíritu atu kria umanidade foun, anti-Babel. Possibilidade atu rona iha lian rasik "Maromak nia kmanek sira" la'ós buat seluk selae, komunikasaun Evanjellu nian, ne'ebé sei halo tubun komunidadade universál. Hodi la husik sira-nia kultura, sira-nia diferensa sira, povu hotu sei rona Jezús nia proposta no sei iha possibilidade atu integra iha komunidadade salvasaun nian, iha-ne'ebé ko'alia lian hanesan no iha-ne'ebé ema hotu bele koko domin no komuñaun ne'e, ne'ebé halo povu sira diferente liu, sai maun-alin. Buat ne'ebé esensiál mak hakat liu diferensa sira no, iha respeitu ba liberdade, nasaun sira sai ida de'it.

Pentekostes "Apóstolu sira nia hahalok" nian mak, ita bele dehan, pájina programátika Igreja nian no haklaken buat ne'ebé sei sai rezultadu husi asaun "sasin sira" Jezús nian: umanidade foun, anti-Babel, moris husi Espíritu, iha-ne'ebé ema hotu iha kapasidade atu komunika no relasiona malu nu'udar maun-alin, tanba Espíritu mak lei aas liu, nu'udar bee-matan domin no liberdade nian.

## **LEITURA II – 1 Cor 12,3b-7.12-13**

Komunidadade kristán Corinto nian moris no laran-manas, maibé la'ós komunidadade ezemplár iha moris domin no fraternidade nian: sira haketak malu, istori malu no mosu rivalidade sira, ne'ebé perturba komuñaun no sai kontra-testemuño. Kestaun sira "karizma" (Espíritu nia don sira) nian sai forte liu: ema sira ne'ebé iha don karizmátiku sira konsidera an katak sira-ne'e mak Maromak hili, simu roman husi Nia no dalabarak asume atitude autoritarizmu no prepotênsia nian ne'ebé la favorese fraternidade no liberdade; husi sorin seluk, sira ne'ebé la simu don sira ne'e, hetan desprezu no desklasifikasaun, laho oportunidade no laho lian iha komunidadade.

Paulo la bele ignora situasaun ida-ne'e. Iha Surat I ba Koríntio sira, nia korrije, hanorin, fó konsellu, hatudu komportamentu sira-ne'e nia inkoerênsia, inkompativel ho Evanjellu. Iha testu ne'ebé ohin propoin mai ita, Paulo aborda kestaun "karizma" sira-nian.

## MENSAJEN

Uluknanai, Paulo hanoin katak presiza tetu ka avalia don karizmátiku sira nia validade, atu keta ko'alia kona-ba karizma sira ho komportamentu sira ne'ebé hakarak de'it garante priviléjiu ba figura ruma. Tuir Paulo, “karizma” loos mak lori atu konfesa katak “Jezús mak Na'i” (basá la bele iha opozisaun entre Kristu no Espíritu) no tenke sai util ba comunidade nia di'ak.

Aleinde ne'e, membru sira comunidade nian tenke iha konxiénsia katak, maski iha diversidade don espírituál nian, Espíritu mak atua ka hala'o nia knaar iha fiar-na'in hotu; katak maski iha diversidade funsaun nian, Na'i Jezús mak horik iha hotu. Nune', la iha “sarani sira primeira nian” no “sarani sira segunda nian” (klase ida no klase rua). Buat ne'ebé importante mak don sira Espíritu nian ba ema hotu nia di'ak no tenke uza– la'ós atu hadi'ak pozisaun rasik ka “ego” rasik – maibé ba comunidade tomak nia di'ak.

Paulo konklui ninia rasiósinu hodi kompara comunidade sarani ba “isin” ida ho membru barak. Apezárde diversidade membru no funsaun nian, “isin” ida de'it. Iha membru hotu sirkula moris hanesan, basá hotu-hotu simu batizmu iha Espíritu ida de'it no “hemu” iha Espíritu ida mesak.

Paulo apresenta Espíritu nu'udar Ida-ne'ebé habosu no fó moris ba “Kristu nia isin”; halo nune'e, Nia habiit koezaun/uniaun, dinamiza fraternidade no responsavel ba membru oioun ne'ebé forma comunidade nia unidade.

## EVANJELLU – Jo 20,19-23

Testu ne'e (ne'ebé lee ona iha domingu daruak Páskua nian) lori ita ba senákulu, iha loron resurreisaun nian. Nia apresenta mai ita comunidade aliansa foun nian, moris husi asaun kriadora no vivifikadora mesias nian. Maski nune'e, comunidade ida-ne'e seiduak hasoru Kristu resusitadu no seidauk foti konxiénsia kona-ba implikasaun resurreisaun nian. Ne'e mak comunidade takan ida, insegura, ho ta'uk... Nia presiza halo esperiénsia Espíritu nian; depoiz de'it mak nia sai pronta atu asume misaun iha mundu no fó sasin kona-ba Jezús nia projetu libertadór.

Iha “Apóstolu sira nia hahalok”, Lucas haktuir Espíritu ne'ebé tuun ba dixípulu sira iha loron Pentekostes, loron limanulu liutiha Páskua (ba razaun teolójika sira atu halo loron Espíritu tuun akontese iha festa judaika Pentekostes nian, festa don Lei nian no konstituisaun Maromak nia Povu nian); maibé João situa iha kalan Páskua nian, tempu dixípulu sira simu Espíritu.

## MENSAJEN

João hahú hodi resalta situaun comunidade nian. Liafuan “nakukun” [lorokraik], “odamatan taka”, “ta'uk” (vers. 19a): mak kadru ne'ebé reproduz situaun comunidade idan nian ne'ebé lahó protesaun iha ambiente ostíl ida, nune'e, dezorientada no insegura.

Komunidade ida ne'ebé lakon ninia referénsia sira no ninia identidade no la hatene, agora, sá loos atu kaer metin. Jezús mosu “iha sira leet” (vers. 19b). João indika ho forma ne'e katak dixípulu sira, hodi halo esperiénsia enkontru ho Jezús resusitadu, deskobre filafali sira-nia sentru, sira-nia pontu referénsia nian, koordinada fundamentál ne'ebé sai sentru, atu comunidade harii an no foti konxiénsia kona-ba ninia identidade. Komunidade kristán bele eziste iha forma konsistente de'it se tau iha sentru Jezús resusitadu.

Jezús hahú hodi kumprimenta sira, fó ba sira “hakmatek”/dame” (“shalom”, iha ebraiku). Dame” mak don mesiániku ida; maibé, iha kontestu ne'e, signifika liuliu tranzmisaun

serenidade nian, hakmatek nian, konfiansa nian, ne'ebé sei permite dixípulu sira supera laran-ta'uk no inseguransa: husi oin ba oin, terus, mate, sofrimentu, mate, ostilidade mundu nian la bele hatuun dixípulu sira, basá Jezús resusitadu hela “iha sira nia leet”.

Tuirmai, Jezús “hatudu ba sira nia liman sira no nia sorin”. Ne'e mak “sinál” sira ne'ebé evoka Jezús nia entrega, domin ne'ebé hatudu iha krús. Iha sinál sira-ne'e (iha sinál entrega moris nian, domin ne'ebé hasa'e to'o gota ikus raan nian) mak dixípulu sira rekoñese Jezús.

Faktu katak “sinál sira” hela nafatin iha Jezús mak sei sai, ho forma permanente, Mesias ne'ebé nia domin sei suli iha dixípulu sira no iha-ne'ebé ninia saran an sei habosu komunidadade.

Hafoin mai komunikasaun Espíritu nian. Jezús nia jestu atu huu iha dixípulu sira nia leten reproduís Maromak nia jestu atu komunika vida ba ema mai husi rai (João utiliza, iha-ne'e, prezadamente verbu hanesan husi testu gregu Gn 2,7 nian). Ho Maromak nia “huun” iha Gn 2,7, ema sai “ema moris” ida; ho “huun” ida-ne'e, Jezús fó ba dixípulu sira moris foun no halo moris Ema Foun. Oras-ne'e, dixípulu sira soi moris kompletu no hetan kbiit – hanesan Jezús – atu halo ho sira-nia moris don ida domin nian ba ema sira. Hodi Espíritu nia kbiit, sira forma komunidadade aliansa foun nian no hetan bolun atu fó sasin – ho jestu no liafuan – Jezús nia domin.

Ikusnian, Jezús esplisita sá loos dixípulu sira nia misaun (ver. 23): eliminasaun salan nian. Jezús nia liafuan sira la signifika katak dixípulu sira bele ka la bele – conforme sira-nia interese eh dispozisaun – perduá salan sira. Signifika de'it katak dixípulu sira simu bolun atu fó sasin iha mundu, moris ne'ebé Aman hakarak oferese ba ema hotu. Sé mak la aseita kontinua la'o iha dalan egoíзму no mate nian, katak salan. Komunidadade, hodi Espíritu nia kbiit, sei sai mediadora ba oferta salvasaun ida-ne'e.